

पाठ-13
नंदनबनी

सोहल	कंजक	डंगर म्हेरू	मारो-मारी	चडेर
खंधोला	पौन	फणाका	धूर	आंडल
फाहेआ	पुम्बली	दक्ख	बिरध	राई



धार स्योजा दी गोदा बिच
सुंदर, सोहल बचारी ऐ।
मां दी गोदा बैठी जि'यां
कोई कजक कुआरी ऐ॥

थां-थां झरने बगदे
गीत-संगीत खलारा दे।
माल-भडेरू, डंगर-म्हेरू
गौवां गुआलू चारा दे॥

चम्बलियें गी ल्हाई ख'ल्लें
मस्त देआर न नच्चा दे।
मोर-कलाई, नील नलाई
पार-रुआर न नच्चा दे॥

ना गर्मी दा जोर कुतै नां
धुप्पेई मारो-मारी ऐ।
फुल्लें भरी चडेर मनो कोई
मालन गई खलारी ऐ॥

सौनै दे बिच बदल खंधोले
गासै उडदे जंदे न।
इक दुए नै रीहग बनाई
किट्ठे जुड़दे जंदे न॥

पौन फणाके जाडै दे बिच
अजब संगीत खलारा दे।
तपोबनै बिच ऋषि न जि'यां
मैंतर वेद उचारा दे॥

रिमझिम, रिमझिम बदलें लाई
राई, देआर न चौआ दे।
अमरत तोपे धूरें बिचा
कण-कण करियै चौआ दे॥

आंडल तोसैं उप्पर पलची,
लगदी मुट्ठ प्यारी ऐ,
योगन जि'यां करै तपस्या
बैठी बाल खलारी ऐ॥

पालै कन्नै पर्वत पूरा
उप्पर जदूं लदोंदा ऐ।
लगदा चिट्ठी चादर तानी
राजा इंदर सौंदा ऐ॥

बूहटें उप्पर फर-फर फाहे
जिस बेल्लै बी बरदे न।
कशश ओपरी, रूप ओपरे
नंदनबनिया तरदे न।

पुम्बलियें पर बर्फ सम्हाली
रुक्ख तपै बिच बैठे दे।
बिरध रिखि जन लाई समाधी
ताड़ी लाई ऐठे दे॥

एह कुदरत दे शैल नजारे
फ्हाड़ै उप्पर सजदे न।
दिवखी सुरगी दक्ख सुन्हाके,
तार मनै दे बजदे न॥

उस दुनिया बिच जाने गी मन
करदा नित्त त्त्यारी ऐ।
इस हवा दा इक फणाका
लक्ख रोगें दी कारी ऐ॥

-: अभ्यास :-

1. हेठ दित्ते दे सुआलें दे जवाब लिखो :-

क) नंदनबनी कविता च केहड़े-केहड़े रुक्खें-बूहटें दा जिकर
आए दा ऐ?

- ख) कवि ने स्योज धार दी तुलना कोहदे कन्नै कीती दी ऐ?
- ग) कविता च बदलें दा म्हीना केहडे म्हीने गी आखेआ गेदा ऐ?
- घ) कविता च कु'ने-कु'ने पशु-पखेरुएं दा जिकर होए दा ऐ?
- ङ) कवि ने प्हाड़ें पर पेदी बर्फू दी तुलना कोहदे कन्नै कीती दी ऐ?

उद्देश्य : पाठै दा चेता दरहाना।

2. स्हेई शब्दें कन्नै खाल्ली थाहर भरो :-

फर-फर, चडेर, धूरें, झरनें, खंधोले

- क) थां-थां बगदे गीत-संगीत खलारा दे।
- ख) सौनै दे बिच बदल गासै उडदे जंदे न।
- ग) फुल्लें भरी मनो कोई मालन गेई खलारी ऐ।
- घ) अमरत तोपे बिचा कण-कण करियै चौआ दे।
- ङ) बूहटें उप्पर फाहे जिस बेल्लै बी ब'रदे न।

उद्देश्य : स्हेई शब्दें कन्नै वाक्य-पूर्ति करना।

3. हेठ दित्ते दे शब्दें दे सम-अर्थी शब्द लिखो।

जि'यां :- सोहल — कुंगला, नाजक

चडेर — डंगर —

पौन — धूर —

फणाका — कशश —

बिरध — ओपरी —

उद्देश्य : भाशा ज्ञान दी समर्थ बधाना।

4. स्हेई कथन सामनै (✓) गलत कथन सामनै (X) दा नशान लाओ :-

क) स्योज धार कश्मीर च ऐ।

ख) इस कविता च डुगर दे मैदानी इलाके दा चित्रण होए दा ऐ।

ग) देआर दे बूहटे उच्चे फ्हाड़ें पर होंदे न।

घ) सौन म्हीनै सभनें थमां मती बरखा होंदी ऐ।

ङ) आंडल बेल दा नांS ऐ।

उद्देश्य : जानकारी पक्की करना।

5. नंदनबनी कविता गी पढ़ियै तुंदी अक्खीं सामनै जेहड़ा चित्तर बनेआ ऐ, उसी अपने शब्दें च लिखो।

उद्देश्य : रचनात्मक प्रतिभा दा विकास करना।

6. कविता दे जेहड़े अंश तुसें गी मते शैल लग्गे, उ'नें गी जबानी चेतै करियै क्लासै च सनाओ।

उद्देश्य : स्मरण शक्ति ते काव्य-पाठ दा अभ्यास।

7. इस कविता च आए क्रिया-शब्दें गी ताल्लोते लिखो। जि'यां :-

बैठी — बौहना बगदे — बगना

.....

उद्देश्य : वाग्भागें दे ज्ञान दा विकास करना।

अध्यापकें आस्तै निर्देश

डोगरी क्रिया रूप-रचना च निश्चय-अर्थ जां सामान्य अर्थ च वर्तमानकालक रूप-रचना दी चर्चा पिच्छें कीती गई ऐ। अध्यापकें गी लोड़चदा ऐ ओह उसदा अभ्यास दरहांदे होई विद्यार्थियें दी जानकारी गी जकीनी बनान। इसदे इलावा धातुएं दे संज्ञार्थी रूपें कन्नै बी परिचित करान। जि'यां :-

धातु + ना	जां	धातु + अना
पी + ना = पीना		टुर् + अना = टुरना
धो + ना = धोना		चुक्क् + अना = चुक्कना
दे + ना = देना		मिल् + अना = मिलना

बुद्धिमान—चतर-सुजान

ननेहाल भु'भां	द्रंडना सोहा	कुढ़ना डूहूरा	मनोमन रौला
------------------	-----------------	------------------	---------------

सोहे दियां छुट्टियां पेदे अजें दौं गै दिन होए हे ते नीतू ते मकरंध दा ननेहाल जाने दा कार्यक्रम हफते बाद दा बने दा हा। मां ने जाने थमां पैहलें-पैहलें छुट्टियें दा कम्म मकाने दी शर्त रक्खी दी ही तां जे आनियै पढ़ने दा कम्म कीता जाई सकै। पर कल्लै थमां मकरंध रुस्से दा हा ते कम्म नेई हा करा दा। नीतू गी एह फिकर लग्गे दा हा जे ओहदा कम्म नेई मुक्केआ तां जाने दा कार्यक्रम होर अगड़ा पेई जाहग। मकरंध इस लेई रुस्से दा हा जे उसी घरै च सारे द्रंडदे रौहदे न ते नीतू गी शाबाश थ्हांदी रौहदी ही — कदें इनाम बी। नीतू मकरंध गी समझांदी रौहदी ही जे शरारतां नेई करा करै ते पढ़ने बक्खी ध्यान ला करै। बुद्धि ते तेज ऐ पर पढ़ने बक्खी मन नेई लांदा। जे किश करने गी आखो करी ओड़दा, बस। नीतू गी ख्याल आया जे कहानी सुनदे-सुनदे मत मकरंध गी चेता भु'ल्ली जा जे ओह रुस्से दा ऐ। इसलेई ओह कहानियें दी कताबा चा इक कहानी जोरें-जोरें पढ़न लगी पेई।

“इक हा राजा। ओहदे कोल दो दोस्त नौकरी आस्तै आए। राजे ने दौनें गी पंजीयें-पंजीयें रपेऽ उप्पर नौकर रक्खी लैता। कोई छें म्हीनें बाद इक दी तनखाह पंजाह रपेऽ करी ओड़ी ते दुए दी तनखाह पंजी रपेऽ गै रेही।” कहानी पढ़दे-पढ़दे नीतू ने दिक्खेआ जे मकरंध ओहदे कोल आई बैठे दा हा। पर उ'नै जाहर नेई होन दिता। कहानी पढ़दी रेही। “जेहदी तनखाह पंजी रपेऽ ही ओह हर बेल्लै कुढ़दा रौहदा हा। मनोमन उसी राजे

पर रोह बी औंदा हा। इक दिन उ'नै राजे गी पुच्छी लैता जे ओहदे दोस्तै दी तनखाह पंजाह रपेऽ ते ओहदी पंजी रपेऽ की?" हूनै तगर मकरंध ड्हूरा बी भरन लगी पेदा हा। उसी रुस्सने दा चेता भुलदे दिक्खियै नीतू ने आखेआ, "जे तूं कहानी सुननी ऐ तां में उच्चे-उच्चे पढ़ां नेई तां मनोमन गै पढी लैं।"

मकरंध ने आखेआ, "हां, में बी सुननी ऐ।"

तां नीतू ने आखेआ "तां फही कहानी मुक्कने उप्पर इक सुआलै दा जवाब देना पौना ऐ। दस्स, मंजूर ऐ।"

नीतू ने कहानी पढ़ना जारी कीता — राजे ने आखेआ तनखाह बी कम्मै मताबक होंदी ऐ। पंजीयें रपेऽ आह्ला नौकर आखन लगा "सरकार, जेहड़ा कम्म मीं कोई दसदा ऐ में हर कम्म करनां।" राजे ने उसी आखेआ "चगानै चा किश रौला ऐ सनोचा दा, जा दिक्खी आ हां, भला केह ऐ?" ओह दिक्खन गेआ ते आनियै राजे गी सनाया जे उत्थै मते लोक किट्ठे होए दे न। राजे ने पुच्छेआ जे छड़े मर्द गै न जां जनानियां बी हैन। ओह आखन लगा जे उन्न उस बक्खी ध्यान निं दित्ता, "अच्छा, में जन्नां ते दिक्खी औन्नां।" पंजियें रपेऽ आह्ला नौकर दिक्खन गेआ ते फही आनियै सनान लगा, "सरकार, मते मर्द ते पंदरां-बीह जनानियां न।" राजे ने पुच्छेआ "जे ओह सारे खड़ोते दे हे जां बैठे दे?" नौकरै आखेआ "में एह जाच निं कीती। अच्छा में फही जन्नां।" आनियै उन्न सनाया जे सारे बैठे दे न। राजे ने पुच्छेआ "कोई दरी-दुरी बछाई ऐ दी जां भु'भां गै बैठे दे न।" नौकरै आखेआ, "जे उन्न ध्यान निं दित्ता ते इसलेई फही जन्नां दिक्खी औन्नां।" राजे ने आखेआ, "तूं रौहन दे ते इत्थै बौह। तेरे दोस्तै गी भेजने आं, जेहड़ा पंजाह रपेऽ तनखाह लैंदा ऐ।" राजे ने दुए नौकरै गी आखेआ, "जा, दिक्खी आ चगानै च रौला कनेहा ऐ?" दूआ नौकर गेआ ते आनियै सनाया जे "उत्थै कोई सौ हारा आदमी किट्ठा होए दा ऐ, जिंदे च कोई

पंदरां-बीह जनानियां न। ओह सारे गै दरी पर बैठे दे न।”

नीतू बोल्ली, “मकरंध, तूं दस्स जे फही राजे ने केह आखेआ होग?”

“तूं मिगी बुद्धू समझे दा ऐ केह?” मकरंध बोल्लेआ।

“नेई ते, मेरा भापू ते बड़ा हुशयार ऐ। चल हून फटाफट दस्स, फही स्कूलै दा कम्म बी करना ऐ।” “इयै जे ओह अपनी बुद्धि कोला कम्म लैदा ऐ ते थोहड़े समें च मता कम्म करी दिंदा ऐ; इसलेई इनाम दे तौरा उप्पर उसी मती तनखाह थोंदी ऐ।”

नीतू बोल्ली, “जवाब ते तेरा ठीक ऐ। पर क्या राजे ने इयां करना चाहिदा?”

“की नेई, जेहड़ा चंगा कम्म करै, उसी इनाम ते थोना चाहिदा।” अपने खीरले शब्दें तगर पुजदे-पुजदे मकरंध समझी गेआ जे नीतू ने उसी एह कथ सनाइयै केह समझाया ऐ। ओह उट्टेआ ते अपना बस्ता लेई आया ते नीतू गी आखन लगा — “में समझी गेआ दीदी, हून में बी शाबाशी दा इनाम लैना ऐ।”

-: अभ्यास :-

1. हेठ दित्ते दे सुआलें दे जवाब लिखो :-

- क) सोहे दियें छुट्टियें च नीतू ते मकरंध ने कुत्थै जाना हा?
- ख) मकरंध की रुस्से दा हा?
- ग) नीतू मकरंध गी कहानी की सनाना चांहदी ही?
- घ) चगानै च किन्ने मर्द ते जनानियां हे?
- ङ) खीरा च मकरंध केह निश्चा करदा ऐ?

उद्देश्य : पाठे दा चेता दर्हाना।

2. स्हेई शब्दें कन्नै खाल्ली थाहर भरु :-

भरन, बुद्ध, कम्म, शकीन, बड़ा

क) मेरा भापू ते हुशयार ऐ।

ख) मकरंध कहानी सुनने दा बड़ा ऐ।

ग) तूं मिगी समझे दा ऐ केह?

घ) मकरंध ड्हूरा बी लगी पेआ।

ङ) जेहड़ा चंगा करै, उसी इनाम थहोना चाहिदा।

उद्देश्य : स्हेई शब्दें कन्नै वाक्य-पूर्ति करना।

3. पढ़ो, समझो ते लिखो :-

जोरें — जोरें

.....

उच्चे — उच्चे

.....

सुनदे — सुनदे

.....

पुजदे — पुजदे

.....

उद्देश्य : क्रिया-विशेषणें दा ज्ञान कराना।

4. स्हेई कथन सामनै (✓) गल्ल कथन सामनै (X) दा नशान लाओ :-

क) नीतू ते मकरंध भैन-भ्रा हे।

ख) राजे दे नौकर आपू चें दोस्त हे।

- ग) नीतू ने छुट्टियें च दादी कोल जाना हा।
- घ) मकरंध ने कहानी नेई सुनी।
- ङ) दौनें नौकरें गी पंजाह-पंजाह रपेऽ तनखाह थोंदी ही।

उद्देश्य : जानकारी गी पक्का करना।

5. इस कहानी थमां केह शिक्षा थोंदी ऐ, अपने शब्दें च लिखो।

उद्देश्य : रचनात्मकता दा विकास करना।

6. कोई कहानी क्लासा च सनाओ।

उद्देश्य : अभिव्यक्ति-कौशल दा विकास करना।

7. इस पाठै च बरतोए दे क्रिया-रूपें दे भूतकाली रूप बनाओ :-

जि'यां :-

द्रंडना

द्रंडेआ

.....

.....

.....

.....

.....

.....

.....

.....

उद्देश्य : क्रिया-काल रचना दा अभ्यास कराना।

अध्यापकें आस्तै निर्देश

इस पाठ च लगी पेई, आखेआ, मुक्केआ, आया, दित्ता, लैता, रेही, उट्ठेआ, बैठा आदि क्रिया-रूप बरतोए दे न।

अध्यापकें गी चाहिदा ऐ जे ओह डोगरी दी भूतकालक क्रिया-रूप रचना बारै जानकारी दिंदे होई विद्यार्थियें गी इ'नें प्रयोगें बारै अभ्यास करान। डोगरी च भूतकालक रूप बनानै आस्तै स्वरांत धातुएं कन्नै 'त्' प्रत्यय लगदा ऐ ते व्यंजनांत धातुएं कन्नै 'एआ' प्रत्यय।

जि'यां :-

स्वरांत : पी + त् + पुलिंग इकवचन - 'आ' = पीता

पुलिंग बहुवचन - 'ए' = पीते

स्त्रीलिंग इकवचन - 'ई' = पीती

स्त्रीलिंग बहुवचन - 'इयां' = पीतियां

व्यंजनांत : लिख् + शून्य + पुलिंग इकवचन - 'एआ' = लिखेआ

पुलिंग बहुवचन - 'ए' = लिखे

स्त्रीलिंग इकवचन - 'ई' = लिखी

स्त्रीलिंग बहुवचन - 'इयां' = लिखियां

कम्प्यूटर

काया-कल्प	गलबा	विकसत	पौंहच
बरतून	सैहल	रक्षा उपकरण	परखना
लाज-मुआलजा	यादाशती	रूप-सरूप	दुबधा

अज्जै दे युगै गी किश लोक विज्ञान दा युग आखदे न ते किश लोक कम्प्यूटर दा युग। स्हेई बी ऐ। ऐसा कोई खेतर नेई ऐ जित्थै इ'नें दौने दा जलबा नेई होऐ।

कम्प्यूटर दी गै गल्ल करचै तां अज्ज विकसत देश गै नेई बल्के विकासशील देश बी कम्प्यूटर गी हर चाल्ली दे कम्मं आस्तै बरतन लगी पेदे न। की जे कम्प्यूटर मनुक्खी सभ्यता दे इतिहास च ऐसी म्हत्तवपूर्ण जरूरत बनियै उब्भरेआ ऐ, जिसनै मनुक्खी जीवन दी काया-कल्प करी दिती ऐ। मुश्कल कोला मुश्कल सुआल हल करने च, जन-संचार दे खेतरै च क्रांति आहनने च, रक्षा-उपकरणों गी परखने ते स्हेई ढंगै कन्नै बरतने च, रेल-यात्रा गी सैहज ते सौखा बनाने च, प्रकाशन दे खेतरै च क्रांति आहनने च, सेहतु दे खेतरै च नमियां तब्दीलियां आहनने आदि च कम्प्यूटर दी भूमिका टकोहदी रेही ऐ।

आओ, इ'दे चा किश टकोहदे खेतरें दी गल्ल करचै :-

कम्प्यूटर दे औने कोला पैहलै संचार दा खेतर इन्ना विकसत नेई हा। पर अज्ज इस च क्रांति आई गई ऐ। टेलीफोन, फैक्स, पेजिंग, मोबाइल दे बाद इंटरनेट ने जि'यां सारी दुनिया गी साढे हत्थै दी पौंहच तगर लेई आंहदा ऐ। इंटरनेट राहें किश गै खिनें च कोई बी जानकारी दुनिया दे कुसै बी कोने तगर भेजी बी जाई सकदी ऐ ते मंगोआई बी जाई सकदी ऐ।

अज्ज कोई बी बदेशी अखबार जां रसाला पढ़ने आस्तै असें गी कम्प्यूटर दा सिर्फ इक बटन गै दबाना होंदा ऐ।

छपाई दे खेतरै च बी इस कम्प्यूटर कारण बड़ा बदलाऽ आया ऐ। पराने समें च छपाई करने आस्तै कम्पोजर गी इक-इक अक्खर जोड़ना पौंदा हा। उस समग्री दिये गलित्ये गी ठीक करना ते उस आस्तै जी दा जंजाल बनी जंदा हा। पर कम्प्यूटर दी बरतून दे बाद छपाई दा कम्म सैह्ल बी होई गेआ ऐ ते उस च कलात्मकता बी बधी ऐ।

सेहतु सरबंधी सेवाएं आह्ले खेतर च नां सिर्फ बमारी दी जांच करने, बल्के लाज-मुआलजा करने, अप्रेशन करने ते दुआइयां बनाने दे कम्मै च बड़ा सुधार आया ऐ। अज्ज कम्प्यूटर दी मदद कन्नै अप्रेशन पैह्ले कोला सौखे ते घट्ट खर्च आह्ले होई गेदे न ते सफलता दी प्रतिशत च बी बाद्धा होआ ऐ।

रेल सेवाएं गी आम जनता आस्तै आरामदेह बनाने ते टिकटें दे आरक्षण दी समस्या कोला मुक्ति दोआने च कम्प्यूटर ने नुमायां भूमिका नभाई ऐ। अज्ज इंटरनेट राहें घर बैठे-बैठे रेला दियां टिकटां बुक बी होई सकदियां न ते कैसल बी। हून यात्रा करने आह्लें गी कोई-कोई घेंटे टिकटां लैने आस्तै रीहगें च खड़ोने दी बी जरूरत नेई।

कम्प्यूटर है कैह ऐ? आओ एहदे बारै गल्ल करचै -

कम्प्यूटर दरअसल मशीनें दा इक समूह ऐ जेहड़ा समग्री (Data) गी त्यार बी करदा ऐ ते साम्भदा-सम्हालदा बी ऐ। इस प्रक्रिया गी इनपुट (Input) आखदे न ते जिसलै इसै समग्री गी लोड़ पौने पर मॉनीटर दी स्क्रीन उप्पर जां प्रिंटर दी मदद कन्नै छापी दिता जंदा ऐ तां इस प्रक्रिया गी आऊटपुट (Output) आखदे न।

कम्प्यूटर दे कोई हिस्से होंदे न जेहड़े बक्ख-बक्ख कम्में गी करने आस्तै उस कन्नै जोड़े जंदे न।

कुंजी पट्टी (Keyboard)

इसदा रूप-सरूप टाईपराइटर कन्नै काफी मिलदा-जुलदा ऐ। इसदे राहें वर्णमाला ते गिनतरी दे हिंसे टाईप कीते जाई सकदे न। टाईप कीती



गेदी सूचना गी मॉनीटर दी स्क्रीन उप्पर पढ़ेआ ते बदलेआ जाई सकदा ऐ ते भविकख आस्तै कम्प्यूटर च रक्खेआं बी जाई सकदा ऐ।

सी.पी.यू. (C.P.U.)

एह इक डब्बे आंगर होंदा ऐ, जिस च नियंत्रण कक्ष (Control Unit) ते स्हाबी तर्की कक्ष (Arithmetic and Logic Unit) ते यादाशती यंत्र (Memory device) किट्ठे करी दित्ते गेदे होंदे न। यादाशती यंत्र गी अस कम्प्यूटर दा दमाग आखी सकने आं। इस च सारी समग्री खास चाल्ली कन्नै भरी जंदी ऐ तां जे लोड़ पौने उप्पर अस कम्प्यूटर दी इस समग्री गी बरती सकचै। इस यादाशती यंत्र च रक्खी जां कठेरी गेदी सूचना-समग्री गी बदलेआ बी जाई सकदा ऐ ते बिल्कुल खत्म बी कीता जाई सकदी ऐ।

मॉनीटर (Monitor)

इसदा रूप-सरूप टेलीविजन कन्नै काफी मेल खंदा ऐ। इनपुट यंत्रें (Input Devices) राहें कीते गेदे कम्मं दे नतीजे जिस आऊटपुट यंत्र (Output Device) उप्पर दिक्खे-पढ़े जाई सकदे न, उसी मॉनीटर (Monitor) आखदे न।

प्रिंटर (Printer)

कम्प्यूटर दे आऊटपुट यंत्र (Output Device) ते इनपुट यंत्रें द्वारा कीते गेदे कम्मं गी जेहड़ा यंत्र प्रकाशत रूपै च साढ़े सामने आहनदा ऐ, उसी प्रिंटर आखदे न।

इंनें प्रमुख हिस्सें दे इलावा कम्प्यूटर दे किश होर हिस्से बी होंदे न पर कम्प्यूटर इंदी गोचरी नेई होंदा। जि'यां स्कैनर (Scanner), मॉडम (Modem), माऊस (Mouse), जॉय स्टिक (Joy Stick) बगैरा।

उप्पर गनाए गेदे कम्प्यूटर दे सब्भै हिस्से जि'यां यादाशती यंत्र, कुंजी पट्टी, सी.पी.यू., मॉनीटर, प्रिंटर, स्कैनर, मॉडम, माऊस, जॉय स्टिक बगैरा कम्प्यूटर दे हार्डवेयर खोआंदे न। इंनें गी छूहेआ जाई सकदा ऐ।

कम्प्यूटर इंनें हिस्सें दे कन्नै गै कम्म करना शुरू नेई करी दिंदा। उस कोला कम्म लैने आस्तै उसी किश निर्देश बी देने पौंदे न, जि'नें गी प्रोग्राम जां साफ्टवेयर आखदे न। असें गी कम्प्यूटर उप्पर बक्ख-बक्ख चाल्ली दे कम्म करने आस्तै बक्खो-बक्ख प्रोग्रामें जां साफ्टवेयरें दी लोड़ पौंदी ऐ। जि'यां किश टाईप करने आस्तै वर्ड प्रोसैसिंग साफ्टवेयर दी ते कोई चित्र जां आकृति बनाने आस्तै ग्राफिक साफ्टवेयर दी लोड़ पौंदी ऐ।

कम्प्यूटर गी इक्कला माहनु बी अपने कम्मा आस्तै बरती सकदा ऐ ते मते लोकें दा समूह बी। समूह च बरतने आस्तै कम्प्यूटर गी इंटरनेट दा कनेक्शन लैने दी लोड़ पौंदी ऐ। कोई बी माहनु अपने कम्प्यूटर कन्नै मॉडम ते टेलीफोन गी जोड़ियै ते इंटरनेट कनेक्शन लेइयै दुनिया दे कुसै

बी कोने तगर अपनी पौहच बनाई सकदा ऐ।

कम्प्यूटर अज्जै दे युगै च बरदान साबत होआ करदा ऐ पर इसदी बरतून मती करने आह्ले आस्तै एह् अभिशाप बी बनी जंदा ऐ। शरीरक ते मानसक समस्याएं च बाद्धा करने ते बेरोजगारें दी गिनतरी बधाने च कम्प्यूटर ने नकारात्मक भूमिका बी नभाई ऐ।

-: अभ्यास :-

1. हेठ दित्ते दे सुआलें दे जवाब लिखो :-

- क) कम्प्यूटर ने कु'ने-कु'ने प्रमुख खेतरे च तब्दीलियां आहनने च चेची भूमिका नभाई ऐ?
- ख) कम्प्यूटर कन्नै संचार दे खेतरा च किस चाल्ली दी क्रांति आई ऐ?
- ग) कम्प्यूटर दी बरतून दे बाद छपाई दा कम्म कि'यां सैहल होई गेआ ऐ?
- घ) सेहतु सरबन्धी सेवाएं च कम्प्यूटर कारण कैसा सुधार आया ऐ?
- ङ) कम्प्यूटर दे केह्ड़े हिस्सें गी हार्डवेयर आखदे न?

उद्देश्य : पाठे दा चेता दरहाना।

2. स्हेई शब्दे कन्नै खाल्ली थाहर भरो :-

खर्चीली, टाईपराइटर, बुक, निर्देश, काया-कल्प

- क) कम्प्यूटर ने मनुक्खी जीवन दा करी दित्ता ऐ।

- ख) कुजी पट्टी दा रूप-सरूप कन्नै काफी मिलदा-जुलदा ऐ।
- ग) कम्प्यूटर दी मदद कन्नै सजरी पैहले कोला सौखी ते घट्ट होइ गइ ऐ।
- घ) अज्ज इंटरनेट राह घर बैठ बैठे रेंला दियां टिकटां बी होई सकदियां न ते कैसल बी।
- ङ) कम्प्यूटर कोला कम्म लैने आस्तै उसी किश बी देने पौंदे न, जिने गो प्रोग्राम जा साफ्टवेयर आखदे न।

उद्देश्य : स्हेई शब्दें कन्नै वाक्य-पूर्ति करना।

3. हेठ दित्ते दे वाक्यें चा ठीक वाक्य सामनै (✓) ते गलत वाक्य सामनै (X) दा नशान लाओ :-

- क) कम्प्यूटर एसियें मशीनें ट समूह ऐ जेहड़ा कुसै बी सूचना समग्री गी तयार बी करदा ऐ ते साम्भदा-सम्हालदा बी ऐ।
- ख) कम्प्यूटर गो दित्त जाने आहले निर्देश गी हार्डवेयर आखदे न।
- ग) टाईप कीती गेदी सूचना गां मॉनीटर दी स्क्रीन उप्पर पढ़ेआ ते बदलेआ जाइ सकदा ऐ।
- घ) इंटरनेट राहें काइ बी जानकारी दुनिया च कुतै बी भेजी जाई सकदी ऐ त मंगाआई बी जाइ सकदी ऐ।
- ङ) कम्प्यूटर उप्पर बक्ख-बक्ख चाल्ली दे कम्म करने आस्तै बक्खो-बक्ख प्रोग्राम जां साफ्टवेयरें दी लोड़ पौंदी ऐ।

उद्देश्य : जानकारी गी पक्का करना।

4. कम्प्यूटर ने जि'नें-जि'नें खेतरें च विकास आंहदा ऐ, उं'दे चा कु'नें द'ऊं खेतरें उप्पर खु'ल्लियै चर्चा करो।

उद्देश्य : अभिव्यक्ति कौशल दा विकास करना।

5. हेठ दित्ते दे शब्दे दा अर्थ दस्सियै उं'दी वाक्ये च बरतून करो।

जि'यां :-

बरतून = इस्तेमाल — अज्ज हर थाहर अंग्रेजी दुआइयें दी बरतून मती होआ करदी ऐ।

सैहल = —

कायाकल्प = —

मंगोआना = —

वदेशी = —

कुंजी पट्टी = —

नकारात्मक = —

उद्देश्य : वाक्य-रचना दा अभ्यास करना।

6. पढ़ो, समझो ते लिखो :-

पढ़ना — पढ़चै

बनाना — बनाचै

लिखना —

दबाना —

पीना —

मनाना —

न्हौना -- सुआलना --

खाना -- खलाना --

उद्देश्य। क्रिया दी अर्थ-संरचना दी जानकारी देना।

अध्यापकें आस्तै निर्देश

इस पाठ च खाचै, पढ़चै, बनाचै, पीचै क्रियापद आज्ञार्थ वर्तमान काल दे रूपै च न। डोगरो च वर्तमान काल दे इ'नें आज्ञार्थी रूपें लेई धातु कन्नै बक्ख-बक्ख पुरशें दे अधार उप्पर प्रत्यय लगदे न। उत्तम पुरश इकवचन आस्तै — 'आं' प्रत्यय लगदा जि'या :-

दौड़ + आं = में दौड़ा

उत्तमपुरश बहुवचन आस्तै 'चै' अस दौड़चै

मध्यमपुरश इकवचन आस्तै 'शून्य/अ' = तूं दौड़

मध्यमपुरश बहुवचन आस्तै 'ओ - तुस दौड़ो

अन्यपुरश इकवचन आस्तै 'ऐ' ओह दौड़ै

अन्यपुरश बहुवचन आस्तै 'न/अन' = ओह दौड़न

अध्यापकें गी चाहिदा ऐ जे ओह विद्यार्थियें गी आज्ञार्थी क्रिया रूपें दा होर अभ्यास करान।

डुगगर दी चित्रकला

चित्रकारी	नफासत	उल्लेखनेजोग	कैनवस
खु'ल्ला-डु'ल्ला	दि'ब्ब	चुंझनुमा	मोहत
शंगार	पछौकड़	खडुतपुना	फंध

डुगगर प्रदेश अपनिये द'ऊं टकोहदिये विशेशताएं कारण पूरे विश्व च प्रसिद्ध ऐ। ओह विशेशतां न— डोगरें दी वीरता ते डुगगर दी चित्रकला। डुगगर दी चित्रकला दुनिया च 'फ्हाड़ी चित्रकला' दे नांऽ कन्नै जानी जंदी ऐ।

चित्रकारी दी कला गी 'चित्रकला' आखदे न ते जि'यां साहित्य-रचना दे ढंग-तरीके गी 'शैली' आखदे न ते संगीतकला दी शैली गी 'घराना' इसै चाल्ली चित्रकला दे ढंग-तरीके लेई 'कलम' नांऽ बरतोंदा रेहा ऐ, जिसी अंग्रेजी च 'स्कूल' आखदे न। इ'यां ते डुगगर च गुलेर, चम्बा, रामकोट आदि केई 'कलमें' चित्रकला गी गुहाड़ बखशेआ पर त्रै कलमां बड़ियां चेचियां न। ओह न — बसोहली कलम, कांगड़ा कलम ते जम्मू कलम।

जम्मू कोला कोई सौ मील दक्खन-पूर्व आहली भेठा रावी दरेआ दे कंढे बसोहली नांऽ दा कस्बा बस्से दा ऐ। सैकड़े ब'रे पैहलें इस धरती पर चित्रकला दा मुंढ पेआ। बाद च ओह चित्रकला पूरे विश्व च बसोहली कलम दे नांऽ कन्नै



प्रसिद्ध होई। चित्रकला दी इस कलमा गी राजा महीपत पाल ने संरक्षण दित्ता ते राजा मेदनीपाल दे संरक्षण च इस कलमा दी नफासत च खासा



विकास होआ ते जम्मू, गुलेर, नूरपुर आदि थाहरें थमां बी कलाकार बसोहली दरबार च आई रले। उस बेल्ले दे मशहूर चित्रकारें च मानक, नैनसुख, देवीदास आदि नांऽ उल्लेखने जोग न। इस कलमा दियां टकोहदियां रचनां न — भागवत

पुराण पर अधारत चित्रमाला, रसमंजरी ते गीत-गोविंद दे चित्रें दे सैट।

बसोहली कलमा दा कैनवस बड़ा खुल्ला-डुल्ला ऐ ते ग्राएं दा सादा शलैपा इस कलमा दी खास टकोहद ऐ। इनें तस्वीरें च नारी दा शलैपा बड़े दि'ब्ब रूपै च चतरोए दा ऐ। नारियें दे बड्डे, चुंझनुमा नक्क, झुकी दी ठुड्डी ते उं'दियां अब्द खुल्लियां अक्खां दिक्खने आहलें गी मोहत करी लैदियां न। उं'दे टल्ले कुतै-कुतै बरीक न ते उनें शैल शंगार कीते दा ऐ। आदमियें दे कद्द लम्मे न ते नक्क-मत्था सरोखड न।



बसोहली-चित्रें च पछौकड अक्सर सादी ऐ ते फिक्के सैल्ले, सुहे जां पही फिक्के चाकलेटी रंगें च ऐ। इनें तस्वीरें च अक्सर खडुत्तपुना लभदा ऐ; ते जाहरी तौरा पर कोई हरकत नेई बझोंदी। इं'दे च सुन्ने, गोटे, मोती ते सब्जें दे

थाहर कुसै पक्खरा दा फंघ लाए दा लभदा ऐ। जेहड़ा टकोहदा लिशकदा ऐ। चित्रें च 'फंघै' दी बरतून बसोहली कलमा दी टकोहदा ऐ की जे कुसै होर कलमा ने एह प्रयोग नेई कीते दा। बसोहली कलमा च बी इसदी बरतून 'रसमंजरी' चित्रमाला च गै मती होई दी ऐ।

बसोहली कलम 'रावी' दरेआ दे इस कंठै जन्मी ते पारले कंठै जन्मी 'कांगड़ा कलम'।

13,000 फुट दी ऊंचाई पर

शिवालक च बस्से दा कांगड़ा थाहर कुदरती शलैपे कन्नै मालामाल ऐ ते नेह शलैपे दी गोदा पली-मठोई कांगड़ा कलम। प्हाड़ी चित्रकला दी सभनें कलमें च अपनी शैली ते तकनीक दे कारण इस कलमा दी इक टकोहदी पन्छान ऐ। इनें चित्रें दी सम्बेदनशीलता ते सूक्ष्मता भारती जीवन दे संयम ते आत्मा दी शांति दे प्रतीक न। इनें चित्रें च जयदेव दा गीत गोविंद, राम



दरबार, सतसई, बारामासा आदि विशें दे इलावा हीर-रांझा, मिर्जा-साहिबा, सोहनी महिवाल आदि प्रमुख न। इस कलमा दी होर टकोहदी विशेषता एह ऐ जे पात्रें दे नक्श-पत्तरे बरै कोई इक निश्चत घाट नेई ऐ, इस लेई कलाकारें दी कल्पना मताबक

इं'दे च बक्खरापन लभदा ऐ। चित्रें च गुहाड़ आहनने आस्तै इं'दे च जैदातर शुद्ध रंग बरतोए दे न ते अज्ज दो-सवा दो सौ बरें बाद बी इं'दी लिशक

बरकरार ऐ। जित्थूं तगर इंदे चतेरें दा सरबंध ऐ तां इयै आखेआ जंदा ऐ जे उसलै नैनसुख ते मानक गै दो प्रमुख नांऽ हे, जेहड़े अपने संरक्षक राजा



अमृतपाल दे नेई रौहने परैत बसोहली छोड़ियै कांगड़ै गे हे।

ठाहरमीं सदी च जम्मू इक शक्तिशाली राज हा। एह महाराजा रंजीत देव हुंदा समां हा। अमन ते शांति कारण उसलै जम्मू बपार ते कला दा केंद्र हा। जिसलै पंजाब च

उथल-पुथल होई तां अमन-पसंद ते कलाकार लोक ल्हौर छोड़ियै इत्थै आई बस्से, जिंदे च 'सेऊ' नांऽ दे कलाकार दा परोआर बी हा। महाराजा रंजीत देव होरें त'वी कंठै समाधियें च नैनसुख नांऽ दे चित्रकार गी वर्कशाप खोहल्ली दिती ते इयां जम्मू कलमा दा मुंठ पेआ। इस कलमा दियें तस्वीरें च विशे दी बंदश नजरी नेई औंदी। एह अपनी-अपनी चाल्ली दियां न। की जे चित्रकला दी एह अजें शुरुआत ही इसलेई इस कलमा च कांगड़ा जां बसोहली कलमा आहली बरीकी नजरी नेई औंदी। फही जिसलै जम्मू च कलाकारें लेई कोई संरक्षण नेई रेहा तां एह लोक बसोहली, नूरपुर ते कांगड़ै टुरी गे।

इयां लगभग दो-सवा दो सौ साल पैहलै विश्व दी उत्कृष्ट चित्रकला दा डूर जम्मू च फुट्टेआ ते फही एह बेल बसोहली च पली-मठोई ते कांगड़ै जाई परवान चढ़ी।

-: अभ्यास :-

1. हेठ दित्ते दे सुआलें दे जवाब लिखो :-

- क) डुगर दी चित्रकला विश्व च किस नांऽ कन्नै प्रसिद्ध ऐ?
- ख) डुगर दियां प्रमुख कलमां केहड़ियां न?
- ग) ठाहरमीं सदी च जम्मू च परिस्थितियां कनेहियां हियां?
- घ) बसोहली कलम दियें प्रमुख रचनाएं दे केह नांऽ न?
- ङ) कांगड़ा कलमा दियें विशेषताएं बारै लिखो।

उद्देश्य : पाठे दा चेता दरहाना।

2. स्हेई शब्दें कन्नै खाल्ली थाहर भरो :-

चित्रकला, कलम, कैनवस, फंधें, नैनसुख

- क) उसलै ते मानक गै दो प्रमुख नांऽ हे।
- ख) चित्रकला दे ढंग-तरीके लेई नांऽ बरतोंदा रेहा ऐ।
- ग) चित्रें च दी बरतून बसोहली कलमा दी टकोहद ऐ।
- घ) चित्तरकारी दी कला गी आखदे न।
- ङ) बसोहली कलमा दा बड़ा खुल्ला-डुल्ला ऐ।

उद्देश्य : स्हेई शब्दें कन्नै वाक्य-पूर्ति करना।

3. स्हेई कथन सामने (✓) करो ते गलत कथन दे सामने (X) दा नशान लाओ :-

- क) शुरु च बसोहली च चित्रकला गी राजा महीपत पाल ने संरक्षण दित्ता।
- ख) नैनसुख ते मानक प्रमुख चित्रकार होए न।
- ग) हीर-रांझा, सोहनी-महिवाल आदि जम्मू कलमा दियां रचनां न।
- घ) बसोहली कलमा दे चित्रें च नारियें दे नक्क निक्के न।
- ङ) गीत गोविंद भानु दत्त दी रचना ऐ।

उद्देश्य : जानकारी गी पक्का करना।

4. हेठ दित्ते दे शब्दें दे वाक्य बनाओ :-

- तकनीक
- कलम
- फंघ
- चतेरा
- निश्चत
- लिश्क
- बंदश
- संरक्षक
- डूर
- वीरता

उद्देश्य : वाक्य-रचना दा अभ्यास कराना।

5. हेठ दित्ते दे सुआलें दे स्हेई जवाबै पर ✓ करो :-

क) चित्तरकारी दी कला गी आखदे न (मूर्तिकला/चित्रकला)

ख) चित्रकला दी शैली गी आखदे न (घराना/कलम)

ग) डुगगर दी चित्रकला दा प्रसिद्ध सामूहक नांऽ ऐ
(फ्हाड़ी चित्रकला/डुगगर चित्रकला)

घ) कांगड़ा कलम च गुहाड़ आहनने लेई रंग बरते दे न
(शुद्ध/नक्ली)

ङ) रावी दरेआ दे इस कंठै मठोई
(कांगड़ा कलम/बसोहली कलम)
उद्देश्य : जानकारी दी परख करना।

6. (क) बसोहली कलमा बारै अपने शब्दें च खोहल्लियै लिखो।

(ख) कांगड़ा कलमा दी चेची विशेषताएं बारै लिखो।

(ग) फ्हाड़ी चित्रकला दी प्रमुख रचनाएं दी चंदी त्यार करो।

उद्देश्य : विशेषत सूखमता दा ज्ञान ते अभिव्यक्ति कौशल दा विकास करना।

7. वाक्यें गी शुद्ध करिये लिखो :-

जि'यां :- कांगड़ा 13000 फुट दी उंचाई च शिवालक दी फ्हाड़ियें पर बस्से दा ऐ।

शुद्ध :- कांगड़ा 13000 फुट दी उंचाई उप्पर शिवालक दी फ्हाड़ियें च बस्से द ऐ।

क) सैकड़े बरै पैहल्लें बसोहली दी धरती च चित्रकला दा मुंढ पेआ।

- ख) बसोहली कलमा दे चित्रे पर जाहरी तौरा च कोई हरकत नेई बझोंदी।
- ग) ग्राएं च सादा शलैपा इस कलमा च खास टकोहद ऐ।
- घ) जिसलै जम्मू च चित्रकारें कन्नै कोई संरक्षण नेई रेहा तां एह लोक टुरी गे।
- ङ) जम्मू कलमा दियें तस्वीरें चा विशे दी बंदश नजरी नेई औंदी।

उद्देश्य : कारक-रचना दा अभ्यास कराना।

अध्यापकें आस्तै निर्देश

इस पाठ च 'आई रले', प्रसिद्ध होई, पली मठोई, परवान चढी, वगैरा संयुक्त क्रिया रूप न। ओह क्रिया जिंदे च इक कशा मतियें धातुएं जां धातु दे कन्नै कुसै होर तत्व दा योगदान होंदा ऐ उसी संयुक्त क्रिया आखदे न। जि'यां उप्पर दित्ते दे प्रयोगें च (आई रले च) 'आ' ते 'रल्' दो धातुएं दा मेल ऐ। (प्रसिद्ध होई च) च 'प्रसिद्ध' विशेषण ते 'हो' धातु दा संयोग ऐ।

पली मठोई च 'पल् ते मठो' धातुएं दा ते 'परवान चढी' च परवान ते चढू दा। अध्यापक इ'यै जनेह होर उदाहरण देइयै विद्यार्थियें गी संयुक्त क्रिया-रचना दी जानकारी देन।

महाराजा प्रताप सिंह

चमुखी सुविधा	राजकाल रुचि	रम्भ सुरक्खेआ	लोकप्रिय उल्लेखनेजोग	कार्यकाल बंदोवस्त
-----------------	----------------	------------------	-------------------------	----------------------

रियासत जम्मू-कश्मीर दे च'ऊं डोगरा महाराजें च इक महाराजा प्रताप सिंह होर हे। इ'नें सन 1885 ई. थमां लेइयै 1925 ई. तगर रियासता पर राज कीता। इ'दे राजकाल च रियासता च चमुखी विकास होआ। इस्सै लेई लोक इ'नें गी बड़े इज्जतमान कन्नै चेता करदे न।

महाराजा प्रताप सिंह होरें शिक्षा दे विकास-बाद्धे च बड़ी रुचि लेई। रियासता च हाई स्कूल ते कालेज स्तर दी शिक्षा दा रम्भ इ'दे शासनकाल च गै होआ। इस थमां पैहलै लोकें गी उच्च शिक्षा आस्तै रियासता थमां बाहर जाना पौंदा हा।

इ'नें जम्मू च 'प्रिंस आफ वेल्ज़' नांऽ कन्नै इक कालेज खलोहाया जेहड़ा अज्जकल गांधी मैमोरियल साईस कालेज ऐ। इ'यां गै, श्रीनगर च एस.पी. कालेज बी इ'दी गै देन ऐ। इसदे इलावा इ'नें होर मते प्राईमरी, मिडल ते हाई स्कूल बी खोहल्ले। विद्यार्थियें गी पढ़ाई दियां



खासियां सुविधां प्रदान कीतियां। इ'नें इस्लामी स्कूलें दी मदद कीती ते अरबी पढ़ाने दा बी बंदोबस्त कीता।

महाराजा प्रताप सिंह होरें गी खेढें च बी खासी दिलचस्पी ही। इ'नें गी आपूं बी क्रिकेट खेढने दा बड़ा शौक हा। हर ब'रै श्रीनगर च क्रिकेट मैच होंदा हा। इक टीम सैलानियें दी होंदी ही ते इक महाराजा हुंदी, जिस च महाराजा आपूं बी खेढदे होंदे हे।

रियासता दा प्रसिद्ध अखबार 'रणबीर' इ'दे गै समें 5 च निकलना शुरू होआ। इ'नें परजा दे भले-बेहतरी आस्तै केई उल्लेखने जोग कम्म कीते जि'दे च रेशम उद्योग गी बढ़ावा देना, जंगलातें दी सुरक्खेआ, राही-बाही दे कम्में च विकास-बाद्धा करना, सिंचाई दियें स्हूलतें गी बढ़ावा देना आदि शामिल न।

जम्मू-श्रीनगर सड़क बी महाराजा प्रताप सिंह हुंदे राजकाल च गै मुकम्मल होई ते श्रीनगर-गिलगित्त सड़क बी महाराजा दी हकूमत च गै बनाई गई।

महाराजा होर रियासता दी परजा गी बड़ा प्यार करदे हे, इसै करी ओह इक लोकप्रिय महाराजा मन्ने जंदे न।

-: अभ्यास :-

1. हेठ दिन्ते दे सुआलें दे जवाब लिखो :-

- क) महाराजा प्रताप सिंह रियासता दे किन्ने महाराजें चा इक हे?
- ख) इ'दा शासनकाल कदूं कोला कदूं तगर हा?
- ग) मजूदा गांधी मैमोरियल साईस कालेज कुसनै खलोहाआ हा?
- घ) इ'दे समें 5 च केहड़ा अखबार निकलना शुरू होआ हा?

ड) महाराजा दे शासन काल च कुस स्तर दी शिक्षा गी बढ़ावा मिलेआ?

उद्देश्य : पाठै दा चेता दर्हाना।

2. स्हेई शब्दें कन्नै खाल्ली थाहर भरो :-

उच्च शिक्षा, एस.पी. कालेज, चमुखी, क्रिकेट, अखबार

क) इंदे राजकाल च रियासता च विकास होआ।

ख) पैहले लोकें गी आस्तै बाहर जाना पौंदा हा।

ग) श्रीनगर च बी इंदी गै देन ऐ।

घ) इनेंगी आपूं बी खेढने दा बड़ा शौक हा।

ड) रियासता दा प्रसिद्ध रणबीर इंदे गै समें S च निकलना शुरू होआ हा।

उद्देश्य : मनासब शब्दें कन्नै वाक्य-पूर्ति करना।

3. हेठ दिने दे शब्दें दा वाक्यें च प्रयोग करो :-

जि'यां :-

चमुखी — अज्ज उग्रवाद दे कारण मुल्खा च चमुखी अफरातफरी दा म्हौल बने दा ऐ।

इज्जतमान

उल्लेखने जोग

सुरक्खेआ

बंदोवस्त
राजकाल
लोकप्रिय
सुविधा
कार्यकाल

उद्देश्य : स्हेई प्रयोगें कन्ने वाक्य-रचना दा अभ्यास कराना।

4. स्हेई कथन सामनै (✓) करो ते गलत कथन दे सामनै (X) दा नशान लाओ :-

- क) महाराजा प्रताप सिंह रियासता दे च'ऊं महाराजें चा इक हे।
- ख) इ'दा शासन काल 1885 ई. कशा 1925 ई. तगर हा।
- ग) महाराजा होरें खेठें च कोई दिलचस्पी नेई ही।
- घ) इ'दें समें S च रियासता च कोई अखबार नेई निकलेआ।
- ङ) महाराजा प्रताप सिंह होरें शिक्षा दे विकास कम्में च बड़ी रुचि लेई।

उद्देश्य : पाठे सरबंधत जानकारी गी पक्का करना।

5. महाराजा प्रताप सिंह दे इलावा रियासता दे कुसे होर आदर्श राजे दी हकूमत दे बारे च अपने विचार प्रगट करो।

उद्देश्य : रचनात्मक कौशल दा विकास करना।

6. इस पाठ च बरतोई दिरें क्रियाएं गी ताल्लो ते लिखो :-
जि'यां :- राज कीता

.....
.....
.....
.....
.....
.....
.....
.....
.....
.....
.....

उद्देश्य : क्रिया-संरचना दी जानकारी देना।

अध्यापकें आस्तै निर्देश

पिछले पाठें च विद्यार्थियें गी डोगरी क्रिया-संरचना कन्नै परिचित करोआया गेआ ऐ। अध्यापकें गी चाहिदा ऐ जे ओह उ'नें सभनें क्रिया-रूपें दी जानकारी परतियै दरूहान ते कन्नै क्रिया दे भविक्ख काल दे रूपें बारै बी ज्ञान करान। डोगरी च भविक्ख काल दे रूपें आस्तै धातु कन्नै लिंग, वचन ते पुरश अनुसार प्रत्यय लगदे न।

सरकारी स्कूलें च मुफ्त बंडने आस्तै



जे एण्ड के स्टेट बोर्ड ऑफ स्कूल एजुकेशन